




AUR KIRA

BORNEO
LITERATURE
BUREAU









AUR KIRA

Ditulis

HENRY GERIJIH

Gambar digaga

HARRY ANDING

Aur Kira



SAR00023943

PUSAT DOKUMENTASI MELAYU
DEWAN BAHASA DAN PUSTAKA



BORNEO LITERATURE BUREAU

© BORNEO LITERATURE BUREAU, 1965

Dichelak

CASLON PRINTERS, LTD.

HONG KONG

GENTERAN

<i>Telian</i>	<i>Daun</i>
Bungah Bujang	1
Nurun Pegi	3
Kuyang Kejaga	15
Raja Bintang Tiga	32
Simpandai	52
Keling	58
Indai Keling	70

BUNGAH BUJANG

NYADI MENYA bisi bujang siko nama iya Aur Kira. Iya tu biak ka sida Keling diri menyadi. Nyadi menoa orang tu:

Di Panggau Libau
Gegiau Takang Isang.
Kedua bali nama iya
Di Tinting Menalan Lendat
Betungkat Jelap Daun Sabang.

Leboh maia tu kalia orang di Panggau Libau maioh bujang enggau dara. Maia bujang sida dia bisi udah chukup umur lalu patut alai ngator diri, dia sida pen selalu bungah enggau pangan sama bela madah ka diri deka bebini. Nyau kasuah sida udah bungah dia sida nyau deka ngemendar ka ati diri deka bebini. Simpurai pen lalu bejako:

“Enggi aku Salinggar Matahari nya ambi aku ka bini,” ko iya.

Ninga munyi nya, Pungga lalu bejako ngambu, ko iya: “Enggi aku Endu Puyu Berujan ka bini aku.”

Laja lalu bejako ngambu, ko iya: “Enggi aku Endu Lulong ambi aku ka bini.”

Udah nya Keling lalu ngambu Kumang ga ka bini iya. Sekeda sida bukai bisi ga nyebut dara sida sarumah nya dia, tang enda disebut nama ditu.

Ninga samoa sida bukai bela udah ngambu magang indu ka bini, lalu samoa indu ka pama agi gamal udah dambu orang magang, dia deh Aur Kira lalu tusah ati berunding ka bagi indu ka bini iya. Dekati iya nyebut dara sida di Panggau enggau sida di Gelong laban samoa ke patut udah dambu orang magang.

Udah nya lalu bejako ga Keling nanya Aur Kira: “Kami bukai udah ngambu magang, tang sapa deh indu dambu nuan ka bini?” pia ko iya.

“Enda nemu meh aka,” ko Aur Kira nyaut Keling. “Iya ga samoa indu ka semak kitai ditu udah dambu kita magang.”

“Nya nyebut meh nuan, barang indu ka apin dambu orang,

ukai nya baka ka mimit deh dara kitai di Panggau enggau di Gelong ditu," pia ko Keling ga bejako.

Ninga munyi nya Aur Kira lalu berunding dalam ati iya. Uдах nya baru iya nyaut: "Au meh aka," ko iya. "Dalam enda ngasoh nyebut pan nuan, nyebut ga aku. Indah kita deh udah nyebut magang. Enti nitih ka runding ati aku ngelamatu tak lembau meh ati aku bebini ngagai menoa jauh, laban ati enggai beserara enggau samoa kitai ke ditu. Tang dalam pia, laban samoa kitai ka berebak tak udah ngator diri magang. Nya alai enggai ga ati tu tinggal pangan. Nya alai lak ka jako aku nyengala dinga kita, aku ngambu Dayang Langit ka bini aku," pia ko Aur Kira madah ngagai samoa sida buhai.

Ninga munyi nya, lama sida enda bemunyi, laban sida enda enda ngadang iya ngambu indu langit ka bini iya. Dia deh sida Simpurai enggau bujang buhai lalu pedis ati ninga iya nyebut indu tak tinggi bendar nama menoa endor diau. Agi mega indu nya endang dadinga berita manah sereta bajik. Nya meh naka pemajik indu dara bisi di langit din leboh maia nya. Lalu bakanya ga Keling bisi ga ati iya enda lantang laban iya enda sangka ka adi deka bebini ngambi indu tinggi bendar nama. Nya alai, berengkah ari nya, nya meh pun sida iya enda tentu sati enggau pangan agi. Amat sida iya dipeda begulai enggau pangan, tang ati sida bisi mensiban bisi beseni enggau pangan. Ama mega leboh sida bebuti belaban dalam main baka bepangka, bepatis tauka bibat sida iya selalu beripih ngelaban Aur Kira. Kereja ke bakanya bisi bendar berasai ngasoh ati iya enda lantang, tang taja bakanya, iya nat ka utai nya dalam ati diri din, lalu gamal pendiau iya baka ka dipeda nadai penusah.

Sataun udah nya, alai Keling lalu jadi enggau Kumang, Simpurai lalu jadi enggau Salinggar Matahari, Punga mega lalu jadi enggau Puyu Berujan, Laja mega jadi enggau Lulong. Sida buhai pen bisi mega bebini lalu jadi enggau indu sida sarumah dia, bisi ga sekeda bebini lalu nguai ka indu sida di

BUNGAH BUJANG

Gelong Batu Benang. Nya alai tinggal deh tudah Aur Kira tu tadi apin bebini. Lalu sida bukai ke udah bebini bejako ngelesay ka iya:

“Peda kitai Aur Kira ke udah ngambu indu langit ka bini iya, dupah iya nemu jalai ka langit ti kitai nadai enggau iya kin,” pia ko sida bejako enggau pangan, endang pinta dinga iya.

Kabuah sida bejako munyi nya laban sida endang deka ngemalu ati iya. Balat endar samoa sida ke baru udah bebini nya ngelesay ka iya meda iya nadai diri ke sama berebak agi enggau besulu. Amat iya bakanya laban iya rindu bendar besulu enggau samoa anembiak, lalu anembiak ke ari baroh rebak umor iya sigi rindu endar besulu enggau iya. Sida rindu ninga iya nusoi ensera enggau jerita lama dulu kalia. Ari nya mega sida anembiak tu tadi lalu bulih bendar penemu, bulih jalai basa enggau adat asal bansa diri.

NURUN PEGI

NYAU CHUKUP sataun udah nya, nya baru Aur Kira nengkira diri deka nurun pegi ka langit kin. Nyadi iya ke nurun nya enda madah ka diri deka nemuai ka langit, tang madah ka diri deka pegi meda ka menoa bukai. Tujoh hari udah nya, nya baru iya nurun. Bekal dibai iya asi ketupat tujoh iti enggau beras tujoh leka.

Nyadi rumah orang Panggau Libau tu endang kena tuntong pampang jalai raya datai ari maioh bengkah menoa bukai sebelah dunya. Bisi empat iti jalai ke besai agi betuntong kia. Siti nya jalai raya datai ari adap matahari idup, siti nya datai ari adap selatan, lalu siti datai ari adap utara menoa nya. Nyadi Aur Kira ke pegi tu nengah jalai raya siti adap ngagai matahari idup.

Angkat iya ari rumah sida lalu bejalai niti jalai raya nya



Aur Kira

berari-ari. Sahari iya udah bejalai endor iya rembus ba bukit sigi nama Bukit Batu Gajah. Kabuah alai iya dikumbai nama nya, laban ba tuchong iya bisi batu sigi baka gamal jelu gajah ke tingkap ba tanah. Dia mega iya lalu bemalam. Iya ke bemalam dia tindok ba selepak bandir kayu sakayu enda jauh ari batu gajah. Langkau dunju iya batap daun tepus. Seninjik bendar ga malam nya nadai ujan.

Tawas hari pagi nya sereta iya udah badu mela diri iya pen lalu mupok ga bejalai baru. Bejalai meh iya ari nya bukit dipelunggang, bukit ditiki, lembang dipelakang pulai ka ai, sungai di ulu sungai di ili. Niki ka tebing nitih ka arong jalai jani. Leboh hari nyau tengah hari iya pen ngetu ga merarau. Badu merarau bejalai ga iya baru, dia malam dia tindok, hari tawas mupok ga iya bejalai. Tujoh hari tujoh malam iya udah ninggal ka rumah diri alai bekal ketupat iya pan abis ga, semina tinggal agi bekal beras tujoh leka apin dipandok. Leboh katujoh malam iya bemalam dalam babas, dia iya tindok ba pun kara sakayu tumbuh ba tisau tingkah batu. Dia iya bisi mimpi betemu enggau orang siko besai bendar gamal. Tuboh iya bebulu sereta chelum, pala iya betandok tujoh iti beruit baka berayang. Kukut iya panjai sereta begelong baka kail. Ba pun berang iya sapiak-sapiak bisi sayap, lalu ba tengah sayap bisi mata tiga iti berintai baka bara api. Siku iya belancham baka tugal, lengan iya mipis baka belia bandir tapang. Pala patong iya baka pala tukol pengelubak besi. Ngeli iya chelum baka ke bulih mesai mata kapak. Meda antu sangat mesai nya, lalu naka iya penakut ga Aur Kira ka iya.

“Nama gaga nuan ditu?” ko antu nya bejako nanya iya.

“Aku tindok ditu, laban aku suntok malam. Sapa nuan tu?” ko Aur Kira nanya antu nya, tang ati iya abis penakut meda penyai gamal iya nya. Tuboh iya lalu bigak-igak baka ka chelap.

“Aku tu, Antu Gerasi Girau Gerawan, lalu kara tu meh rumah alai aku diau,” ko iya.

BAHAN SELANJUTNYA BOLEH DIDAPATI DI:

KOLEKSI BORNEO

Pusat Dokumentasi Melayu Tun Hamdan Sheikh Tahir,
Dewan Bahasa dan Pustaka Cawangan Sarawak,
Jalan Tun Datuk Patinggi Abd. Rahman Yaakob,
Petra Jaya,
93050 Kuching, Sarawak.

Telefon: 082 – 227 000/ 048

Faksimile: 082-227 088

Emel: eborneo@dbp.gov.my

“Memelihara Warisan Memupuk Wawasan”

